

Txirritola

ARAMAIO / Barikua / 2004ko irailaren 24a / 122. zenbakia

KOORDINATZAILEA: Ubane Madera • Otolara Lizentziaduna 31 20500 ARRASATE • Tel.: 943 71 25 11 • Faxa: 943 71 23 89 • Posta elektronikoa: txirritola@goiena.com • Lege gordailua: SS.1084/02

Haur Eskolarako proiektu berria egin du Udalak

U.M.

Haur Eskola egiteko proiektu berria aurkeztu behar dio Udalak Jaurlaritzako Hezkuntza Sailari. Hala jakinarazi zuen alkateak oraingo astean egindako osoko bilkuran.

Haur Eskola dela-eta, Mertxe Mondragon alkateak udalbatzarri jakinarazi zion Jaurlaritzako Hezkuntza ordezkariak atzera bota duela Udalak aurkeztutako proiektua. Emandako arrazoien arabera, ordezkariak ez du uste Udalak Haur Eskolarako aukeratutako instalazioen baldintzak onargarriak direnik. Hala, Udalarari eskatu dio beste tokiren bat aurkitzeko Haur Eskolarendako. Eta Mertxe Mondragon alkateak udalbatzarri jakinarazi zion dagoeneko aukeratu dutela leku hori, lanen proiektua ere eginda dutela eta datorren astearen amaiera aldera aurkeztuko diotela ordezkariari.

ESKOLAREKIN HASERRE

Horrekin batera, alkateak jakinarazi zuen haserre dagoela San Martin Eskolako batzarrak gai honetan izandako jarrerarekin. Izan ere, hasierako proiektua aurkeztu ostean, Udalak jakin izan



Gogor salatu zuen Mertxe Mondragon alkateak eskolakoek izandako jarrera.

zuen eskolak beste proiektu bat aurkeztu zuela bere kabuz, Udalak aurkeztutakoa baino bi bider garestiagoa. Jakin zuen, baita ere, eskolakoek indarra egin zutela Hezkuntza ordezkariaren Udalarren proiektua onar ez zezaten.

Gauzak horrela, eta eskolako en jarrera salatu eta gero, Mertxe

Mondragonek esan zuen espero duela oraingo honetan halako interferentziarik ez egotea. Eta behin eta berriro gogora ekarri zuten Udalak ez duela dirurik eta Haur Eskola egiteko Udalak ezarritako aurrekontuaren muga 60.000 euro ingurukoa dela eta horretara mugatu beharko direla.

Aramaioren gaineko argazki lehiaketa antolatu dute

U.M.

Aramaioren gaineko argazki lehiaketa antolatu du Udalak. **Aramai bere edertasunean izenburua du. Urriaren 15era arteko astia utzi dute argazkiak aurkezteko.**

Argazki lehiaketako parte-hartzaile bakoitzak nahi beste argazki aurkeztu ahal izango du, koloreetan zein zuri-beltzean. Hori bai, argazki bakoitzari izenburua eta atera zeneko data ipini beharko dizkio. Era berean,

argazki bakoitza gutun-azal batean aurkeztu beharko da, argazkiaren izenburua eta data gutun-azalean ipinita.

Lehen esandako moduan, urriaren 15a baino lehen aurkeztu beharko dira argazkiak. Udal Liburutegira edo udal txerara bertara eraman behar dira. Hala, aurkeztu diren argazki guztiak Udalarren esku geratuko dira eta aurrerantzean argitaratuko dituen egutegi, liburuxka eta antzerakoetan erabili ahal izango ditu, betiere, egilearen izena ipinita. Epaimahaia bera

ere Udalak antolatuko du, herriko jendearekin.

SARIAK ETA SARI BANAKETA

Hiru sari banatuko dituzte: lehenengo saria 150 euro; bigarrena 100 eta hirugarrena 75 euro. Azaroan jakinaraziko dute epaimahaiaren erabakia; hain zuzen ere, azaroaren 22an banatuko dituzte sariak, 19:00etan, kultura etxean. Horren ostean, jasotako argazkiekin erakusketak ipiniko dute Sastiñan. Informazio gehiago behar duenak udaletxean edo kultura etxean dituzte lehiaketaren oinarriak.

Bertso eskola handitu egingo dute aurten

U.M.

Berritasunak datoz aurtengo ikasturtean Aramaioko Bertso Eskolara. Batetik, irakasle aldaketa izango da eta bestetik, talde gehiago sortuko dituzte. Ikasturtea urriaren aurreneko astean hasiko da, Maritxu Kajoi egunaren ostean. Hala adierazi digu eskolako arduradun Manex Agirrek.

Manex Agirrek jakinarazi digunez, berak eskola utzi beharko du behin-behinerako, ikasketa kontuengatik. Hortaz, bera ordezkatzeko irakasle berria hartu beharko dute eskolarako. Horrez gainera, adierazi digu aurtengo ikasturtean bi talde berri sortu nahi dituztela Aramaioko Bertso Eskolan. Euren asmoa da txikiendako talde bat sortzea, 9 urtekoendako, eta beste bat 15-16 urteko gazteendako. Beti ere, Udalak hori egiteko nahikoa dirulaguntza ematen badie. Manex Agirrek esan digunez, azken urteotan ber-

tsotan ikasteko eta jarduteko eskaera handia sortu da herriko neska-mutil gazteen artean.

IRAKASLE BERRIAK

Hala, sortuko diren talde berriendako eta Manex Agirrearen lekua betetzeko, irakasle berriak izango ditu bertso eskolak. Oraindik guztia ondo lotzeke dutela jakinarazi digu Manex Agirrek, baina aurreratu digunez asmoa da orain arte bi irakasle izan diren lekuan (Manex Agirre eta Enaitz Alustiza), aurtendik aurrera lau irakasle izatea; honako hauek, hain justu ere: Iñaki Viñaspre, Iker Agirre, Gillen Agirre eta Lierni Altuna.

ORAIN, HIRU TALDE

Gaur egun hiru talde ditu Aramaioko Bertso Eskolak: 10-11 urte bitarteko neska-mutikoen talde bat; 13-14 urte bitarteko beste bat eta 17-18 urte bitarteko gazteen hirugarren bat. Guztira, 30 bat neska-mutilek jarduten du bertsogintzan.

Datorren astean irekiko dituzte ehizarako postuak

U.M.

Azken asteotan ibili dira zozketatzen aurtengo ehiza-postuak. Egun hauetan, akreditazioak-eta jasotzen ibili dira herriko ehiztariak. Izan ere, irailaren azkeneko astean bukatuko da hegazti-migratzaileak ehizatzeako debekualdia. Bereziki, usoak, ahateak eta birigarroak ehizatuko dituzte.

Oilogor Ehiza Taldeko presidente Eduardo Fernandezek esan digunez, nahiz eta ehiza denboraldia abuztuan hasita egon, irailaren azkeneko astean zabalduko dituzte hegazti-migratzaileak ehizatzeako herriko postuak. Aramaioren halako ehundik gora postu dago, mendietan sakabanututa. Eta ehiztarien elkarteak berrehundik gora bazkide ditu (Aramaiokoak eta Aramaiorekin harremanen bat duten ingu-

ruko zenbait ehiztari banel). Hala, bazkideak bikoteka banatu eta postuak bikote horien artean zozketatu dituzte. Egun bakoitzerako postu bat. Izan ere, helburua da bazkideek posturik ez errepikatzea, guztiak baldintza berak izateko.

ORAIN DELA PARE BAT URTE

Hala, irailaren amaieran hasiko dira ehiztariak zeruari begira, hegazti-migratzaileen zain. Hain zuzen ere, usoak eta birigarroak dira orain nagusi, bata ahateak ere.

Aramaioko ehiza-babeslekuak Udalarena da. Orain dela pare bat urte atera zuten enkantera eta Aramaioko Oilogor Ehiza Taldeak eskuratu zuen. Harrezkero, ehiza-postuak zozketatzeaz, ehiza-babeslekuak baldintza egokiak izateaz arduratzen da herriko elkarteak.

